

D E D V C T I O
N V L L I T A-
T V M :

Q V I B V S

Proscriptionem in Aulâ Impera-
toriâ contra Electorem Palatinum
decretam , & in Imperio evulga-
tam , scatere ; et proinde nullius
roboris, valoris, effectûs aut
considerationis esse;
breviter pro-
batur.

*Felix quem faciunt aliena pe-
ricula cautum.*

A N N O M. D C. X X I.



ET MERITO IN IPSO SERMONE
nis hujus vestibulo expressè protestamur & præ-
famur; Nos nullius , cujuscunque conditionis aut
status ille sit, multo minus Cæsareæ Majestatis digni-
tatem, honores, titulos, privilegia, & munera læsum,
vllatenysve imminutum , sed puram putam dumta-
xat veritatem, & manifestos divulgatae Proscriptionis errores, defectus
& nullitates, in lucem erutum & ante oculos positum, simûlque qui-
bus illa stabiliri & colorari prætenditur , refutatum & eversum ire
velle.

REMISSAM ut aggrediamur, in ipso statim Proscriptio-
nis limine infausta & noxia illa INCOMPETENTIA ET
SUSPECTI JUDICIS NULITAS haud obscurè
apparet, & indicio suo se prodit: Dum nimur Imperator in propriâ
causâ, Judicis partes, in tam arduo præsertim tantique momenti &
præjudicij negotio, sibi arrogavit & attribuit. Quamvis enim ma-
xime exterorum quidam reperiantur, qui autument Imperatorem in
suâ causâ & lite Judicis officio defungi posse: illorum tamen opinio,
tanquam falsa & à legum tramite deflectens, communioribus suffra-
giis damnatur. At vnanimi consensu & voto docetur, non tam na-
turali & communi æquitati, quam civili honestati, Germaniæ aliorum-
que regnorum moribus convenire, Imperatorem & Principem sibi in
propriâ causâ jus dicere non debere. Textus. In c. inter querelas
27. caus. 23. q. 4. L. Vnicā C. Ne quis in suâ causâ judicet. L. xvii.
ff. de judicis. L. x. ff. de Juris. Handed. Consil. 105. n. 14. Affli-
ctis In Constit. regni. tit. de violentia. n. 3. & 4. Menoch. De ad ipsō
posse. Remed. 1. n. 5. Socinus In Reg. 195. Felinus Ad c. cum ve-
nissent. in fin. de Judic. Bodinus De Rep. lib. 4. cap. 6. circa finem.
Vbi, Si contra naturam est, inquit, vt eundem judicem & accusato-
rem feramus; Rex autem in omnibus publicis judiciis Accusator sit;
quanto id vetius est in crimen Perduellionis, quo reus Principis vitam
aut famam violasse dieitur? Idem tradit Isernia In c. 1. n. 84. de

prohibet. feud. alienat. per Fr. d. & alii infiniti. Nam Princeps in Contractibus & Judicijis habet loco Privati & ut privatus. Schrad. De feud. p. 2. sectio. 3. n. 77. & sect. 20. n. 238. Et, ut ait Guevara Lib. 1. c. 35. in fin. Horolog. Princ: In omnibus rebus tolerari potest ut potior sit conditio Principis, præterquam in solâ Justitiâ; quam prorsus æqualem esse oportet & opus est inter Principem & Rempublikam. Et sane, quomodo quis adfectu aliquo, vindictæ libidine, propriæ autoritatis zelo & studio commodi impeditus, rectè judicet? Sibi enim, ut Seneca De ira lib. 1. c. 16. ait, indulget: ex libidine judicat, & audire non vult: patrocinio non relinquit locum, & ea tenet quæ invasit, & eripi sibi judicium suum, etiam si pravum sit, non sinit: æquum videri vult quod judicavit: vanis & extra causam versantibus commovet: infestus patrono, reum damnat: etiam si ingenitur oculis veritas, amat & tuetur errorem, & coargui non vult. Jure G A L L I C O Rex, in suâ quamvis minoris momenti causâ, sibi Jus non dicit: sed ei à Parlamentis dicitur: & ita interdum causâ cadit: Ut post Paponem 2. Notar. c. Division de l'ordre de plaider, docet Gothofred. Ad d. rubricam, Ne quis in suâ causâ judicet. Chafsan. In Catal. glorie mundi. part. 5. Cons. 5. Vbi hoc Regum Gallia institutum multis laudibus evexit. Buxtorff. Ad c. 5. Aurea Bull. conclus. 80. in Notis ad liter. b. Et, ut Bodinus Lib. 3. c. 6. scribit: Si Rex, inquit, adversus privatos in privatis judiciis restitui velit, Procurator Regius sedem ac locum mutat, ne publicam sed privatam causam agere videatur, & ne Regium nomen ac Principis splendor oculos magistratum præstringat. Quod & ipsum in aliis quoque Regnis & Rebus publicis fieri afolet. Bodinus Lib. 1. c. 8. Sic in Daniâ, universus Regni Senatus: Arnisæus De jure Majest. lib. 1. c. 6. n. 15: In Arragoniâ, Justitia Arragonica; in Angliâ, Justitia Magna; si cum alio Regi lis est, judicare solet: Ut ex Borell. De praefat. Reg. Cathol. c. 46. n. 14. & Bodino d. loco docet Buxtorffius, d. conclusion. 80. in Notis ad lit. g.

D e q u o tanto minus in Imperio Germanico ambigendum: propterea quod tam Imperii & Aureæ Bullæ Constitutiones, quam notissima usque crebro firmata Consuetudo, hoc luculentè testificentur, & liquido commonstrent; P A L A T I N V M E L E C T O R E M, IMPERATORE V T I M P E R AT O R E C O N V E N T O, J U D I C E M E S S E: In priuatis vero causis C A M E R A M,

V E L A L T I V D T R I B U N A L adiri posse. Aurea Bull. Caroli IV. Cap. 5. in fine. Vbi scribitur: Quod Imperator super causis pro quibus impetus fuerit, habeat, sicut ex Consuetudine introductum dicitur, C O R A M Comite P A L A T I N O R H E N T I, E L E C T O R A Princeps, R E S P O N D E R E. Marq. Freher. De Orig. Palat. lib. 1. c. 15. in fin. Exemplum in Alberto, qui apud Palatinum Rodolphum fuit ab Electoribus accusatus, recitat ex Chronicis Altahens. Freherius C. 16. in fin. Leodium in Palatin. Origine. Speculum Saxon. Lib. 3. Artic. 52. in fine. Weichbild. Lib. 3. Articul. 8. & 9. Specul. Suevic. Lib. 1. c. 20. §. 4. & Lib. 2. c. 43. §. 6. Buxtorff. Ad Auream Bullam Conclus. 77. & 80. & 83. & in Notis lit. b. & c. Quando autem Imperator A C T O R I S partes sustinet simili modo juxta regulam, forum rei sequi; & vel coram Judicibus, quos more Majorum vulgo Austregas appellant; vel in Camera; vel etiam caussarum modo & ratione ita exigente, coram Imperii Ordinibus & Comitiis agere, controversiæque decisionem expectare debere; nullus, qui vel primoribus labris Historias Germanicas degustauit, & extremis, ut dicitur, digitis res Imperii attigit, dubitare potest. Textus in Ordinat. Cameræ P. 2. tit. 20. Specul. Sueicum Lib. 1. cap. 23. §. 2. Vbi dicitur: Si Rex cum aliquo de bonis, aut aliis rebus, Se Imperiūque concernentibus, litigat; cognitio ad Principes, Comites, Barones, & Imperii Vasallos pertinere debet. Buxtorff. d. Conclus. 83. & in Notis lit. a. & d. & f. Exempla enim ubique obvia & quotidiana sunt, quibus Sole Meridiano eluciens, Imperatores aliquem Principem vel Statum conuenire vel accusare volentes, id ex priscâ & religiosâ Imperii obseruantia & consuetudine, coram Statibus Imperii & Comitiis fecisse.

E T H O C I P S V M antiquiores Imperatores nullo unquam tempore inficiati fuere; sed merito leges & jura Imperii agnouerunt, approbarunt, & illibatè coluerunt. Ita enim S I G I S M U N D V's Imperator, litteris ad Conradum Archiepiscopum Moguntinum die Chiliani Anno M. cccc. xxv. exaratis, de controversiâ Inferioris Germaniæ prouincias tangente scribens: Cùm tanta, inquit, negotiorum mole onerati, decisioni causæ vacare nequeamus; præsertim propterea, quod nobis Jus super istas prouincias prætendentibus integrum non sit, in propriâ nostrâ causâ Judicis munus obire; ipsa quoque lis nobile Imperii feudum concernat; habito cum

Principibus, Comitibus, & Consiliariis consilio, omnino aequitati conuenire judicamus, ut nonnisi PROCERES IMPERII de istâ contiouersiâ cognoscant & judicent. Ejus rei exempla pluria, in ipsâ etiam DOMO AVSTRIACA, reperiuntur. Sic FRIDERICVS III. Imperator, fratrem suum Albertum: RUDOLPHVS I. Ottocarum Regem Bohemiæ (Cuspinian. In Rodolph. I. in Histor. Austriae. Auentinus Lib. 7.) MAXIMILIANVS II. Johannem Fridericum Ducem Saxonie (Recess. Imperii. De Anno 1566. & 1567.) coram Statibus & Comitiis accusasse & conuenisse leguntur. CAROLVS V. vt Archidux Austriae, Marchionem Badensem ratione Sulenberg conuenturus, ipsum requisuit ad nominandum sibi, vigore Ordinationis, Imperii Principes. Quod & factum, causâ ab Episcopo Spirensi decisâ, & postea per viam appellations ad Cameram deuolutâ: vti refertur In Anonymi cuiusdam Observat. Camer. post. decision. Mariliani impressis Observat. 101. Barth. Ita in Sleidano Lib. 1 v. Historiarum legitur, Imperii Proceres & Statutus, postquam amicahilem inter partes compositionem frustrâ tentassent, Imperatorem CAROLVM cum Duce Chiuensi ratione Ducatus Geldriæ disceptantem, ad Ordinarium Jus & Tribunal remisisse, nec unquam approbare voluisse, vt ipsius in suâ causâ Judicis officio defungeretur.

QVODSI Elector Palatinus, vtpote qui vigore Aureæ Bulæ, & vñi receptæ Consuetudinis, moreque Majorum, Cæsarî Judex est, in hac suâ contiouersiâ Judicis partes sibi assumere vellet: quis non arrogantiæ, remeritatis, & injusticiæ, eum accusaret?

SUPERIORVM seculorum Imperatores, licet laxiora regnandi frena habuerint, nec Capitulationibus tam arctè coërciti fuerint; nihilominus tamen, etiam in rebus Imperii commodum & salutem vnicè spectantibus, è Procerum vel Statuum numero aliquem, infelici Proscriptione, motu & autoritate propriâ multare, religioni duxerunt: Sed caussam ad Ordines Imperii & Comitia spectare, & in iis ritu Majorum decidi & definiri debere judicarunt. Hujus rei innumera exempla vbiique in annalibus & retum monumentis occurserunt. Ex quibus pauca, quasi per transennam, delibatum, & leui, vt ajunt, brachio indicatum ibimus. Cum CONRADVS I. apud Confluentes Rheni & Mosellæ frequentibus Comitiis Imperator salutatus esset; Henricus Bojorum & Saxonum Regulus electus

oni refragatur & obnunciat; nouoque Imperatori omne injutiarum genus, detinendo apud se Augustalia insignia, quæ reddere recusabat, & bello nefando Imperium turbando, exhibet. Judicium apud Heripolin constituitur. Henricus accusatur, citatur, & Principum, non Imperatoris, sententiis proscriptur. Auentin. Lib. 6. Annal. Bojor. Sigon. Lib. 11. Histor. de regno Italiae Anno 1138.

Illustre exemplam in FRIDERICVS I. habemus. Is enim, quod Henricus Leo, Bojorum atque Saxonum Rector, mandata facere detrectaret, Comitiis Reginoburgii tertio Kalend. Julii celebratis Anno M. C. LXX. Henricum accusat eoram Ordinibus Imperii; facinora ejus commemorat; fidem datam fregisse, Imperii majestatem violasse, Cæsarî vitæ insidiatum fuisse proponit. Tum Optimates, causâ cognitâ, uno ore Henricum contumacem & conuictum Majestatis damnarunt & proscripterunt. Ita refert Aventin. Lib. 6. Annal. in vita Friderici I.

HENRICVS IV. Ottонem Bavaram, res novas in Imperio molienti proscripturus, in frequenti Senatu accusavit; vniuersos jurisperandos, quo cuncti pro salute Reipubl. ac Principis obsecrati erant, admonuit; & sententiam roganit. Quo facto, Otto per fugus, omnium calculo vt hostis & perduellis proscriptus fuit. Idem Auentinus Lib. 5. Anno Christi 1070.

Idem Imperator HENRICVS, cum excommunicatus esset, & ad dicendam caussam à Principibus Germaniae Heripolin euocatus fuisset, Italiam relicta in Germaniam redire maturauit, ac Procerum Sacerdotumque concordi voluntate commotus, Conuentum apud Triburias haberi permisit, Seque de omnibus, quæ Sibi objicerentur, rationem ibi redditum ostendit. Sigonius Lib. 10. Histor. Regn. Italia An. 1119.

Ita quoq; HENRICVS V. Ducem Lothariae Henricum, quod sibi resisteret, ex consilio, decreto, & Optimatum judicio, dignitate exuit. Auentinus Lib. 6. in Princ. Nauclerus In Chronograph. Generat. 37. Volum. 2. fol. edit. Tubing. 172.

ORTO IV. Ottонem Palatinum de Wittenbach, Eberthum ab Andechs, & Henricum Istriæ, ejus fratrem, non prius, licet caussâ suam personam non tangente, quam à Proceribus fuisset decretum & conclusum, proscriptus & Majestatis damnauit. Naucler. d. Volum. 11. Generat. 41. fol. 209.

Ita Conradus, Dux Bojorum, frequenti Senatu (vt ait Auentin. Lib. v.) Pontificum Principumque, multa auarè superbèque fecisse conuictus, Ducatu moratur. Ottocarus Bohemiæ Rex, & Henricus Bojus, quod Imperator

peratori reluctarentur, ad diuersa Comitia tertium euocati, tandem causâ plenè cognitâ in Conuentu Augustæ Rhætiæ indicto, vbi per Legatos suos Rodolphum sacrilegii atque impietatis accusarant, à Proceribus Imperii, concordibus suffragiis, perduelles hostesque publici declarantur. Auentin. Lib. v i i. Vbi hoc in specie addit: Ludo- uicus, inquit, Præfectus Prætorio Rheni, Regulus Bojorum primò, deinde cæteri rogati sententiam dixerunt. Ita quoque SIGIS- M V N D Y S Fridericu[m] Austriacu[m] corant, Imperiū Statibus conuenit. Ut ex Mut. Lib. 7. p. 276. refert Buxtorff. d. Conclus. 83. in Notis ad lit. f. in fine.

Ex IMPERII Recessibus Annorum M. n. L X V I. & M. d. L X V I I. aliisque, electro & vitro, vt ajunt, Sidonio lucidius apparet; illorum temporum Imperatores in arduis Imperiū tangentibus negotiis, in primis in caussis fractæ turbatæque pacis, pœnâme Præscriptionis promerentibus, nullo prorsus modo, sententias & decreta præproperâ festinatione, aut privato præcociâ consilio, præcipitasse; sed ex more Majorum, cum Imperii Ordinibus, Comitiis calatis deliberasse, vota & suffragia rogasse, æquâ legum trutinâ examinasse, & tandem calculo suo comprobasse. Idcirco in primâ statim fronte Edicti MAXIMILIANI I. De conservatione pacis publicæ, clariſ & perspicuis verbis sanctitur: IMPERII ORDINES CONVENIRE, IN CAUSSIS FRACTÆ PACIS IN COMMUNE CONSULTARE, DECERNERE, ET DEFINIRE DEBERE. Quin imò, HODIE RVS quoque IMPERATOR, vocato in testimonium DE OI sancte & religiosè in Capitulatione suâ Electoribus promisit; SE IN REBUS IMPERIVM ATTINGENTIBVS, EORVM CONSILIO ET SVASIBVS NVMQVAM NON VSVRVM: Et, quod magis est, ETIAM IN REBUS MINORIBVS, CVM PERICVLVM EX ORITVRI COMMVNIS BELLIS, AVT IGNIS NOXII, INDE IN IMPERIO TIMERIPOTEST, ABSQVE ELECTORVM SCITVET CONSEN- SVNIHIL PRÆCIPERE ET DECERNERE VELLE, Jurisjurandi religione attestatus est. Leges enim & Jura præscribunt, ardua Statûmque concernentia, sine Procerum Ordinum que consilio expediri non debere, Bald. & Jason. In l. placet. C. de SS. Ec-

SS. Eccles. Ille n. 2. Hic n. 9. § 11. Knichen. De Saxon. non provoca- cand. Jur. Verbo Elector. c. s. n. 83. Valsquius Illustr. quæstio. 2. n. 20, in fin. Cravetta Consil. 404. n. 31. Buxtorff. Ad proemium Au- rea B. Conclus. 6. & in Notis ibi ad lit. d. Vbi Pruckman. In §. Soluta potestas. Membr. 1. Effet. 3. num. 7. hoc longè verissimum putare, scitibit.

IN REGNO GALLIAE, quo vix ullum magis Regium est, in criminibus, vbi quis seditionis, perturbatæ quietis, & læsæ manifestis reus peragit, Rex judec[er]t esse nequit. Et quamvis ab uno altero Rege tentatum fuerit; tamen Pares Curia vel Parlamenti semper ei obliuictati sunt, & demonstrarunt, neque priscum & patrium momen, neque naturales aut ciuiles leges, villo modo Regi licentiam tales permittere. Prout hoc plurimis exemplis probat & illustrat Bodinus Lib. 4. C. 6. n. 462. & seq. Vbi n. 464. concludens, Quidsi, inquit, æquum ac verum est, Principem judiciis abstinere oportere cum quid suâ interest, vt in omnium benevolentia, velut arce munitissimâ, acquiescat; quantò magis in caussis capitalibus Majestatis ac Perduellionis id fieri oportet? Sic quoque apud Q. Curtium Lib. 6. n. 9. in fin legimus, ALEXANDRVM MAGNUM, cum de Philothâ læsæ Majestatis reo sententiæ dicendæ essent, concione & judicio excessisse, vt cognitores tanto liberius & absq[ue] metu sententias in medium proficeret, caussam accuratiū examine, & rectius decidere possent.

IPSVM PAPAM, cui tanta potestas à Canonistis tribuitur, vt mutare possit quadrata rotundis, sicut ait Hostiensis, et dicitur fieri autoritate DEI, quod ipsius sit autoritate (c. quodcumque 24. q. 1. & c. si quis non recto judicio. q. 3. c. inter corporalia de translat. Ioan. Baptis. Ad instit. Jur. Canon. de divorciis §. sed & si inter. l. b.) tamen ardua negotia explicare volentem, à collegio Cardinalium consilium requirere debere, nihil in maximi momenti caussis statuere, nec aliquem ex eorum numero, ordine moveare, & anathemate ferire posse, Jura docent. Exempl. In o. 1. de renunciatione in 6. § in c. 1. de Schismaticis. Vbi dicitur: De fratrum nostrorum consilio depo- saimus dictos Jacobum & Petrum à Cardinalatibus. Felinus, Decius, Ripa, & alii Canonistæ, In rubric. Clement. pastoralis. in fin. de sent. & re jud. Vbi dicitur, De consilio fratrum nostrorum. De constitut. Barbat. In tractatu de praestantia Cardin. in 8. q. Portius Consil. 164. n. 18. Nicola. Eberh. Iun. Consil. 1. n. 11. volum. 1. Matth. Stephan,

De iuriis lib. 3. p. 1. c. 5. n. 13. 15. per ibi allegat: *Quin imò legge honestatis, Iudicem in suā causā eum esse non posse, sed caussam alteri delegare debere?* Glos. In o. nullam. 2. q. 5. Menoch. Consil. 94. n. 12. & in Arbitr. Jud. question. casu. 438. n. 60. Felinus & Decius In o. cum venissent. Ille n. 7. Iste n. 5. Non immeritò igitur L V D O V I C V S I V. Imperator, in publico Edicto de Iohannis X X I I. Pontificis injustiōā conqueritur. Vbi inter alia, Cūm capitalis, inquit, sit inimicus publicusque hostis, tamen in propria causā actor, testis & judex est. Id quod nec apud Turcas, neque Judæos, neque Saracenos, neque Sarmatas fieri solet. Aventinus Lib. 7. vbi Edicti verba vide.

*Q*VIS N V N C æqui animi judex affirmare ausit? Imperatori; cuius quāmmaxime intererat (sicut ex interceptis ad Moguntiū & Comitē de Zollern literis clare perspicitur) Proscriptionem istam ocyūs accelerare; vrpote cuius festinā publicatione tanto cūtius certiusque scopum suum attingere, votique se compotem reddere, & omnium animos à Palatino Electore abalienare posse sperabat; in hac suā tantī momenti caussā cognitionem judiciūmque conuenire, ne dicam illegitimam Proscriptionem singulari & præcipuo proprii comodi & emolumenti vindictæque studio decernere & promulgare? Neque enim, vt in terminis nostris scribit Bodinus *De Rep. lib. 4. cap. 6. n. 464.* fieri potest, vt si Judex vltionis appetitu, vel perturbatione, vel aliorum temeritate feratur, quantæcumque sit integritas ac prudentiæ, rectè judicet. Sibi enim, vt Seneca *De ira lib. 1. cap. 16.* ait, indulget: ex libidine judicat, & audire non vult: patrocinio non relinquit locum: & ea tenet quæ inuasit, & eripi sibi iudicium suum, etiamsi prauum sit, non sinit: æquum videri vult, quod judicauit: vanis & extra causam versantibus commouetur: infestus patrono, reum damnat: etiamsi ingeritur oculis veritas, amat & tuetur errorem, & coargui non vult.

*Qui fruitur pœna, ferias est, legumque videtur
Vindictam præstare sibi:* ait Claudianus in Eutropio.

*Q*VI P ORR O sibi persuadere, & nobis objicere præsumit; ELECTORES ECCLESIASTICOS huic sc̄a Proscriptioni album calculum addidisse, et pressis, vt dicitur, pollicibus adplausisse, ratamque habuisse: Ille discat, Primiō, Nec hoc sufficere

sufficere; nec reliquos Electores vllā ratione (posito, circa tamen veritatis præjudicium, caussam hanc tanti ponderis ad solum Septemvirorum Collegium spectare) excludi potuisse nec debuisse ab hoc iudicio: ELECTOREM verò SAXONIÆ, quamvis instansissime requisitum & deoratum, numquam consentire voluisse, interceptæ litteræ & typis nuper excusæ palam attestantur: ELECTORIS quoque BRANDENBURGICVM, qui tamen huic negotio se nillatenus implicuit, protus insalutatum mansisse, omnibus notum est; licet Elector Saxonie hoc omnino fieri, ejusque sententiam audiri oportere, enixè monuerit: sicut ex litteris Legati Hispani, Comitis Dognate, ad Albertum Archiducem exaratis minimè dubiè probatur. Deinde cauſas fonticas & maximopèrè prægnantes & validas adesse; quarum virtute ECCLESIASTICI ELECTORES, vt manifestè SVSPECTI & PARTIALES, regulari possint: Dum nimirum aduersæ parti haud occultè se suaque consilia adsociant; et deinceps etiam ei tamquam Attabas suo Numenio, quod ajunt, adhærescere dubio procul studebunt. Huic accedit, quod in litteris Mülhusi datis sententias suas præcipiti inconsultoque more ante tempus eliminare. ELECTOREM QVE PALATINVM, NON AUDITVM, NEC CITATVM, Injustitiæ damnae hand erubuerint. Ne dicam, cum quanto dedecore & ignominia BOREMORVM LEGATORIS adspersati sint, & contra omnium gentium jura admittere decretarint. Nam & alias in cauſis minoris præjudicii, Index licet recusatur, quando votum suum intempestiū reuelauit. Mainhard. *Decis. 94.* Multò magis, quando vni patti in totum adhæret. Angelus *In addit. ad tractat. Baldi de reprobatione testium n. 18.* Cauſalcanus *De brachio regio. part. 5. n. 175.* & part. 3. n. 238. Farnaciusr *De inquis. q. 4. n. 14. 15.* Denique absurdì, vani sterilisque laboris opus esse, per litteras vota missitare, & ostiatim nunc hodie, nunc cras rogare; sed requiri, vt Judices, si velint N Y L L I TATEM euitare, nec oleum & operam perdere, conueniant, & communicato consilio decernant & concludant. Losæus *De Jure Uniuers. p. 5. c. 3. n. 84.* Garsias *De expens.* & melior. Cas. 24. n. 24. Sichard. *Ad rubr. n. 4. C. de rescind. vend.* F. Marcus *De eis. 784. volum. 1.* & plures ibidem adducti: Ex ratione, Quod ita auditis hinc inde rationibus, aliis ab alio potest trahi in suam sententiam, major pars à minori &c.

ET QVAM V I s h̄c vterius objici possit, sicut ipsa Proscriptionis verba haud obscure innuunt, Negotium hoc N O N I M P E R A T O R I S priuatam, S E D T O T I V S I M P E R I I I N C O L V M I T A T E M E T S A L V T E M concernere; et ob id Imperatoris dignitati, titulis, honoribus & existimationi plurimū derogatum; et consequenter crimen læsæ Majestatis commissum esse: Dum nimur Elector Palatinus omnium illorum, quibus vigore Juramenti à Majoribus suis Imperatori, tanquam Supremo Magistratui præstigi obstringebatur, memoriam ejerasse videtur. Se enim Cæsari fidelem & obdientem fore; Numquam constio, in quo contra eū ius Personam, Dignitatem, Autoritatem & Statum deliberatur, adfuturum nec ad stipulatum; Sed semper & ubique illius & Imperii salutem & commodum procuraturum; Damnum vero detrimentumque auersarum jurâsse, vel jurare debuisse: Illud vero, vt pote quod neque cœlum neque terram attingit, caussæ non velificatur: tum quod Elector Palatinus I M P E R A T O R I, V T I M P E R A T O R I, debitam venerationem & obsequium omni tempore præstigit; nihilque. vñquam, ex quo detrimentum autoritati Cæsareæ accedere posset, agressus est aut patravit: tum quod cum I M P E R A T O R E, T A M Q V A M A R C H I D V C E A V S T R I A E, priuatum litē dumtaxat habuerit; et Juramentum fidelitatis, quod Principes Imperii Cæsari jurant, nullam mentionem bonorum patrimonialium Domus Austriacæ faciat. Ne dicam jam, Electorem Palatinum juramentam illud nec per se, nec per aliós vñquam præstirisse. Ex ipsis etiam Proscriptionis verbis controversiam & caussam hanc nec Imperium, nec Imperatorem ut Imperatorem concernere, luculentè colligitur. Neminem enim dubitare arbitramur, quin totius rei summam in Controversia de Regno Bohemico vnicè consisteret judicet: Dum nimur Imperator Jus hæreditarium in isto Regno prætendit, & sui rejectionem & exauctorationem contra æquitatem, jura & justiciam esse pertendit. Elector vero Palatinus contrarium defendere allaborat, Séque legitimo modo moréque Majorum electum esse, & possessionem Regni vacantem justè apprehendisse euincit. Nil quicquam autem Imperio decedit, siue hic, siue ille regnum istud obtineat. Idcirco tota hæc quæstio nihil aliud quām priuata inter duos disceptatio & lis est. Hoc nihilominus lubens affirmatim, Imperii in eo interesse, ut pax quiesque publica lata tecta conservetur,

seruetur, bellique pernicioſa materies sopiatur. Dubium vero nullum est, Imperatorem in hisce Bohemicis motibus omni conatu summaque diligentia proprio commodo vnicè inuigilasse; quo secus facto omnia illa ab armis infelicibus orta mala cuitari, declinati & in herbâ, ut dicitur, opprimi potuissent. At noti Juris est, illud magis inspiciendum, quod P R I N C I P A L I T E R agitur, quām quod A C C I D E N T A R I E. L. Si quis. Vbi Glos., & Dd. ff. si certum petat. In terminis L. Si quis ingenuam. 25. §. 7 ff. de captiv. & postlim. revers. Capycius Decif. 124. n. 9. 11. C A T E R V M adhuc valde ambiguum incertumque est, Num Imperator tam justam bonamque caussam, sicut enixissimè contendit, foueat? Et quisnam primarius præsentium calamitatum faber & architectus existat? Num denique altera pars se in licite defensionis lineis hastenus continuerit & adhuc contineat? Cūm porrò Imperatori sua dignitas, honor & existimatio, etiamsi diadematæ sceptroque Bohemico non potiatur, constet, & illibata integraque maneat; aut aliquis ei Ius suum ferro & armis afferenti resistat & obliuetetur; præsertim quando illud nec in præjudicium nec in contemptum Imperatorii fastigii fiat: Sicut Elector Palatinus sexcenties Se Cæsaris authoritati & existimationi nequicquam detractum ire velle propalam protestatus fuit.

I D C I R C O nullo planè Juris prætextu Imperator Dignitatem Cæsaream huic singulari & separato negotio, cum enormi tertii præjudicio, implicate; nec J U R A M E N T U M, quod ei tamquam I M P E R A T O R I E T I M P E R I O Conjunctim, E T R A T I O N E D U M T A X A T A V G V S T E C E L S I T V D I N I S E T M V N B R I S præstatur, ed & contra verba & mentem jurantis extendere debuit. In juramentis autem sensum, mentem & intentionem jurantis spectandam esse, Canones docent. Gratianus in c. qui pejerare 22. q. 5. §. ex his. Vbi inquit: Ex his omnibus colligitur, quod juramenta secundum intentionem præstantis, non recipientis, à Deo judicantur. C. 1. de jurejur. in b. C. veniens. de juram. C. quinta vallis. eod. L. ultim. ff. qui satisfare cog. Couarruv. Part. 1. in c. quamvis pactum. de pacto in b. §. 5. n. 1. & 2. Fluuii sanè cursum non detorquendum, veteri adagio monemur: alias enim quām plurima inde absurdæ & præpostera, tanquam mala herba, succrescerent. Sequeretur profecto, I M P E R I I vasallos, haud minus D o m u s A v S T R I A C E vasallos esse;

& S T A T U M A L I Q V E M , cui cum Imperatore priuata lis intercederet , N E Q V E secum domi , neque cum suis amicis & administris , quomodo causa vel juris , vel alia via , prout commodum erit , expediunda & obtinenda foret , C O N S U L T A R E P O S S E nec debere . Illud absurdum , hoc iniquum & Cyclopicum esset . Quin imò superiori auorum saeculo Proceres Ordinesque Imperii , expeditiones in Gallos , Venetosque & alios , à M A X I M I L I A N O I , suscep̄tas , & inter C A R O L V M V . & Ducem Gulielmum J u liaci controversias exortas , pro suis agnoscere & tollere , Imperique lites fuisse , judicare debuissent : propterea quod in Juramenti forma etiam hoc ; Neminem videlicet consilio , in quo contra Cesaream Dignitatem , Majestatem , Statum & Authoritatem , consulta fabricantur , interessi sed salutem ejus omni studio procurare , damnum vero auertere velle ; expressum & insertum reperiatur . Quam falsa autem errorisque plena sit hæc argumentatio & illatio , nemo non videt .

Q U O D S I Q V I S S I T , qui sibi imaginari & persuadere vult , Non Imperatorem ipsissimum , sed A V L A C O N S I L I V M confessumque omnem caussam incidi reddidisse , ad perpendiculum examinasse , & sententiam concepisse : Ille nouerit , Primum , hoc non præsumi : tum quod in ipsa Proscriptione nulla fiat mentio ; sicut alias solens est , & à Camera , quæ similiter Imperatoris nomine ejus farinæ Processus publicat , obseruitatur : tum quod C A E S A R E P O T E S T A T I S P L E N I T Y D O pro palmario fundamento & basi illius infelcis Proscriptionis ponatur . Quā verò plenitudine potestatis Consistoriorum Principis vti nequit . Capyc. Decif. 47. n. 7 : Deinde , sicut superius assertum iuimus , cognitionem & censuram tam arduarum caussarum , ipsius præfertim I M P E R A T O R I S P E R S O N A M concernentium , non ad illud , sed ad aliud tribunal spectare ; nec tantam licentiam ab Euangelicis Ordinibus P R I V A T O C A E S A R I S C O N S I S T O R I O tribui nec permitti . Ne dicam jam , Imperatoris Consiliarios Au-
læ , sub ipsa statim mox Bohemicorum primordia , infensos in Ele-
ctorem Palatinum animos haud obscurè declarasse ; præcipiti incog-
tantiâ , ejus quem non audierant caussam carbone notasse & impro-
basse ; & ob id se I N D I G N O S incapacesque O F F I C I I
J U D I C I S reddidisse . Denique silentio hoc loci inuoluen-
dum

dum non est , Dicasterii Aulici P R A E S I D E M , qui ibi Consilio-
rum clavum moderatur , omnino S V S P E C T U M E T N O-
T O R I A I N H A B I L E M judicandi fuisse . Is enim ali-
quot legationibus in favorem Cæsaris & alterius partis præjudicium
expeditis , maximè vero Electorem Saxoniæ , vt Proscriptioni subscri-
bere & calculo suo comprobare veller , omni conatu remisque velisque
orando & persuadendo , judicandi munere cecidit . At Capite su-
specto totum Tribunal dicitur suspectum , & recusari potest . Cancer.
Lib. variar. Resolut. c. 13. n. 188. & seq. Gail. 1. Observat. 33. n. 3.
Boët. Decision. 269. n. 2. Felinus In c. caussam qua. n. 1. de officio de-
leg. Et , quod plus est , Ipsius caussæ cognitio adeò fuit ab isto
Consilio neglecta , & tam procul ablegata , vt defensiones & exceptio-
nes rei nec audierit , nec admiserit : sicut mox pluribus dicetur .
Totum vero hoc Proscriptionis opus , ductu auspicioque L E G A-
T I H I S P A N I , in cujus domo consilia agitata & sumta , pera-
ctum & conclusum fuisse , ex ipsius Legati ad Albertum literis liquido
constat .

A L T E R A I N S I G N I S N U L L I T A S ,
quæ aliquo prætextu haud vinciam colorari poterit , in eo
consistit : Quod Imperator , non tantum ante & post emanato
Proscriptionis processus , Electorem Palatinum terque
quaterque propalam P V B L I C I H O S T I S nomine appellari-
tarit ; sed etiam plusculis ante promulgatam banni sententiam mensi-
bus , Ab E X E C U T I O N E ipsa inceperit , & per Condemna-
tionem , non caussæ examinationem , Processum litis exorditus sit .
Dum scilicet , haud absque summâ præcipitantiâ , durissimum genus
violentî Imperii , per hostilem Marchionis Spinolaë invasionem , &
agrorum depopulationem in I N N O C E N T I P A L A T I-
N A T V , & in conterminis à N B V T R A P A R T E stanti-
bus regionibus , exerceri aut jussit aut permisit ; insuperhabitâ Capitu-
latione , quam sartam testam se obseruatum , D E O in testem ap-
pellato , religiosè more Majorum stipulatus fuit . Illius enim vigore
ei minimè gentium integrum est , E I V S M O D I V I O L E N T I S
E T I M P E R I O S T S P R O C E S S I B V S A L I Q V E M
E X I M P E R I I P R O C E R I B V S , ne dicam E L E C T O-
R E M Principem , quem Præcipuum Imperii Membrum & Colu-
ma

minam Aurea Bulla nominat, PREMERE ET PERSEQUI;
SED FORO, NON FERRO, RES JVS QVB SYVM
REPETERE ET DEFENDERE VBLLE, disertis yerbis jurauit: sicut infra pluribus dicetur. Si Judex in caussis vel minoris momenti & præjudicii, lite nondum ad vmbilicum perduclâ & decisâ, violenter attentare, vim injustam inferre, nodum controuerſiæ non legum arte, sed ense judice discindere præsumeret: nœ ille selâ Prætoriâ ejiciendus, & judicandi munéris incapax declarandus esset. Adde quod NATURALIS AEQUITAS, omnium populorum JVRÆ, & Romanæ LEGES præcipiant & doceant, Inimicum in causâ illius quem odio habet, Judicis partes nullo modo exerceat nec pro tribunali sedere posse nec debere. Quodsi hæc & similia cum Ratione, tanquam æquissimâ judicij lance, ponderantur & expenduntur, facile judicatu erit, quid de hac præpostera Proscriptio ne sentiendum sit.

AD TERTIAM NVLLITATEM primariam delabimur. Quam in eo consistere indubium est: Quod NECESSARIA COGNITIO NE CAUSSÆ in hoc tanti ponderis & præjudicij negotio OMISSEA, CITATIONE PARTIVM SPRETA, insolens illa Proscriptio CONTRA INDEFENSVM ASENTBQM QVB decreta & pronunciata fuerit. Omnia enim Iure, Lege & Moribus requiritur, vt ante omnia, sit ille vel infirmæ classis ciuiis, aut abjectissimus turis cultor, accusatus & conuentus, ad tribunal Iudicis, DICTA dicendæ caussæ, legitimè CITATVR. Quantò strictius & religiosius hoc obseruari debuisset in Electore Imperii, Principe tantæ dignitatis & splendoris? præsertim cum de ejus fortunis, ditionibus, terris, juribus, subditis, vitâ, honoribus, & omniis aliis quæ in hoc mundo cara habet, agebatur. Nam sententia, etiam Imperatoris & Papæ, est ipso jure nulla, quando lata est absque caussæ cognitione, parte non vocatâ, etiam si feratur contra subditum, de plenitudine potestatis, & ex certâ scientiâ, etiam in causâ summatiâ. CITATIO enim dicitur esse DE IVRB DIVINO ET NATURALI. Et sine eâ caussa cognosci nequit. Nec Imperator de eâ dispensare vlo modo potest. L. x. v. C. de Appell. C. i. v. xiiii. xiii. Caus. 2. q. 1. & C. 3. q. 9. per totum.

totum: Quibus locis probatur, Quod omnia, quæ contra absentes & non citatos, in omni negotio aut loco aguntur, sint irrita, nec aliquam obtineant firmitatem. Capycius Decis. 69. n. 35. Menochius Recuper. rem. 8. num. 58. Peregrinus Decis. 137. num. 15. Vantius De Nullit. ex defect. process. n. 30. & seq. 36. Ex defectu Citat. n. 9. 10. Marpurg. Consil. 21. n. 319. & seq. cum multis allegat. Zanger. De Except. p. 1. c. 2. n. 9. & seq. In terminis terminantibus, Decius Consil. 544. alias 606. per tot. Vbi ex iisdem planè fundamentis, Declarationem banni factam à CAROLO V. in Pyrhum & Federicum Gonzagam, irritam & nullam pronunciat:

Qui statuit aliquid parte inaudita alterâ,
Æquum licet statuerit, haud equus fuit;
inquit Seneca in Medea. Et Euripides in Heraclidis ait:
De lite quinam judices, aut qui queas
Pernosse rem, prius atque partem audineris
Alteram?

Quamobrem PAPA CLEMENS V. caussis jam dictis motus, sententiam Proscriptionis ab Imperatore HENRICO contra Robertum Siciliæ Regem decretam & evulgatam, vt temerariam, & à novâ justiciâ, voluntariâ judicantis præcipitatione, profectam damnavit, & de Cardinalium consilio inanem inualidamq; vtpote ab incompetenti judice, contra non legitimè & ad locum tutum citatum; inauditum, & indefensum promulgatam, declarauit. Hoc addito; Facultatem defensionis & illa Imperatori tollere non licere, quæ Juris Naturalis existent. Et quidem in eo acquieuit Imperator; quamvis citimen Regis notorium esse, & proscriptionem exigente ita Justiciâ & de Imperiali potestate decretam prohibebat: vt pluribus legitur in Clement. Pastorale, de sentent. in re judic. Pari modo LVDOVICI CVS BAVARVS; cùm à Papa JOHANN E XXII. qui eum illegitimè & contra Maiorum morem ad Imperium peruenisse afferebat, & propterea pro Imperatore agnoscere nobebat, bullas & diras in se execrationes, fulminis in modum detorquebi & emitti videret; non aliis, Pontificis peruvicaciam elusurus, argumentis vsus legitur. Adstruebat enim & euincebat, processus & assertiones Papæ ipso jure nullas, nulliusque roboris & momenti esse: Quod in caussâ propriâ, cuius cognitio ad eum non spectaret, omnibz legitimâ Citatione, judicari, & pronunciarit: Nec relevare &

excusare, Quod editio ad valvas Ecclesiae affixo citatus fuerit: Jura enim præcipere & exigere, Citationibus Edicitalibus non prius locum esse debere, quam si constet citandum latere, aut sine lare vagari: Quia etiam in citatione ista nec terminum congruum, nec locum tantum, sibi assignatum & nominatum fuisse: Denique Papam in se suosque odio plusquam Vatiniano incensum omni genere Hostilitatis seuire studuisse: Ut refert pluribus in Decreto Ludouici Francofurti contra Bullas Papæ edito Anno M. CCCC. XXXVII. Naucerus Volum. II. Generat. 45. fol. 251. Auentinus Lib. 7. Vbi ex alio diplo- mate Imperatoris hæc verba refert: Idem Hostis, Accusator, Testis & Jūdēx, atque Inimicus Noster Publicus, in Propriā Causā tamen aduersus nos Absentes, Indemnatos, Innovatores, Injudicatores, Inauditos, nec Cittatos, nec Loco Legitimo nec Die dicto, contra Leges, Indictiā Causā, secundum Se, homo bellissimus pronunciauit.

N o v v m itaque non est, nec absurdum, nec injustum, si H v i v s quoque PROSCRIPTIONIS N U L L I T A T E S examinantur, & deformitates eius in lucem protrahuntur: præsertim cum non tantum Imperatores, Reges, Pontifices & Principes viros, sicut dictum est, hoc remedio, & defensionum exceptio- numque clypeo, in similibus casibus vsos; sed etiam Jura & Leges permittere; & ob id à nullo, multo minus ab Imperatore, prohiberi sinistreū accipi debere, legamus & sciamus. Imperatores T H E O D O S I V S & V A L E N T I N I A N V S præcipiunt: Quid ipsorum Rescripta, contra Ius elicita, ab omnibus Judicibus debeat refu- tari. In L. Rescripta. VII. C. de precibus Imp. offer. & in L. x. de Sacros. Eccles. Idemque scribit P A P A A L E X A N D E R I I I. Archiepiscopo Rauennati In c. si quando. s. de rescript. Et me- morat Plutarchus in Apophthegm: R E G E S Æ G Y P T I O S in Magistratibus creandis eos solemini juramento astrinxisse, Ne suis mandatis obcederent, si quid iniquum juberetur.

Q V O D V E R O ad justificandam hanc omissæ Citationis & causæ Cognitionis Nullitatem obtenditur, & pro fundamento pro- cessus Proscriptioni insertum legitur: Quasi Imperii Constitutiones de Anno M. CCCC. xc. in fine, & de Anno M. D. LIX. disertis & liquidis verbis præscriberent & sancirent; In ejusmodi Notoriis, ante oculos omnium positis & manifestis, violata turbataque quietis causis pa- cifica-

offragos, ipso facto, per unanime Imperii suffragium, pœna adjudicari & reos declarari, adeo ut nec Citatione, nec aliâ Declaratione vel Sententiâ opus sit: nihil ad Mercurium, vt aiunt, facit; nec quicquam patroci- natur. Nam pro solidâ confutatione & informatione rei sci- dum est, contrarium potius quoad doctrinam illam, in Thesi verius esse, inque Imperii Edictis perspicue doceri & pæsetibi. Licet e- nem statutum sit, P A C I R V P A S I P S O F A C T O I N P O E N A M P R O S C R I P T I O N I S I N C I D E R E; tamen illud cum micâ salis intelligendum, & hac in ipsis Constitu- tionibus expressâ interpretatione explicandum est: V t pemppe P O E N A I L L A T V M D E M V M H A B E A T L O C V M, C V M A C C V S A T V S, P R A E V I A C I- T A T I O N E, I N P R O S C R I P T I O N E M F V E R I T D E C L A R A T V S, E T I V R E L E- G E Q V E D E N V N C I A T V S; sicut pollucidis & electio- clarioribus verbis in Constitut. Caroli V. Tit. IV. De pœna Paci- fragorum legitur. Et alibi in Conflitut. de Anno M. D. XLVIII. eodem Titul. Et in Constit. An. M. D. LVIII. §. 71. illis verbis: S I P A C I R V P A S, O R D I N A R I O I V R I S M O D O, P R A E V I A C A V S S A E C O G N I T I O- N E, I N P O E N A M I N C I D I S S E F V E R I N T P R O N V N C I A T I, D E C L A R A T I, E T D E- N V N C I A T I. Et in Ordinat. Cameræ. Part. 2. tit. 9. §. 1. Vbi dicitur, R E Q V I R I C I T A T I O N E M, E T I A M S I F A C T V M N O T O R I V M S I T E T M A N I F E S T V M. Gail. De pace publ. lib. 2. c. 3. n. 3. & num. 12. §. finali. Nouell. CXXXIV. ibi, Si conuincantur & condemnentur. Et ita in C A M E R A obseruari, nullumque vel insimi subsellii Statum, absque in jus vocatione & die dicto, legitimâ causâ disquisitione & maturâ exceptionum & excusationum rei cognitione, proscribi & damnari, ex- tra omnem est dubitationis aleam. Nec minus compertum, reos peractos aliquoties à pœnâ aut absolutos & exemptos, aut pro ratione facti, pœnam Proscriptionis in pecuniariam commutatam fuisse; ex præscripto Constitut. Pacis Publicæ de Anno M. D. XLVIII. Tit. de potestate Cameræ. Illud verò, absque in jus vocatione aut par-

tium citatione, sufficientique caussarum cognitione, expediri non potest.

QUOD CIRCA, ut nemo Rescripta Imperii cauillari, aut licuius contrarii & absurdii accusare possit; illa sunt suo & genuino sensu sincerè & dextrè explicanda. Quis enim tam fatui cerebri & pinguis mentis est, qui existimet, Ordinationem Cameræ, & reliqua Imperii Edicta, in locis illis supra laudatis, speciali contrariâ Dispositione dictæ Constitutionis de Anno M. D. L I X. absque ullâ mentione factâ sublata, mutata & correcta fuisse? præfertim cum illi in viridi adhuc sint obseruantia & vsu. Et ipse Gail. Lib. 1. Observat. 3. n. 9. & Lib. 2. de pace publica c. 3. n. 18. docet, Istum Constitutionis dictæ locum de speciali casu intelligendum esse: nempe de palatium militum, prædonum & errorum concursu, quibus nulla competere potest excusatio. Itaque ex illo regulam Catonianam & communem non fabricandam, nec illam extendendam esse, vel infans judicabit. Nam, vt

— in fabricâ, si parua est regula prima,
omnia mendosè fieri atque obstipa necesse est:

Sic quicquid ex hoc falso fundamento processit, nullum est & virtuosum. Huic accedit, Quod Constitutione de Anno M. cccc, xcv. in quâ se præcipue fundat rigida illa Proscriptio, quamvis per recentiores Constitutiones & Cameræ Ordinationem, quoad Citationis requisitum, sit mutata & correcta; tamen expressis & disertis verbis addat, & pro necessario præcipuoque fundamento ponat & requirat: Vt PERPETRATVM FRACTÆ PACIS FACI NVS OMNINO NOTORIVM SIT ET MANIFESTVM, ADEO VT PRORSVS NEGARI NEQUEAT. At hoc loci Factum notorium esse & manifestum, inficias itur, & constanter crimen negatur. Quin imd, ex iteratâ illâ Proscriptioni insertâ Clauſula, PRO RATIONE ET MODO PRESENTIS NEGOTTI, indubie arguitur & colligitur, facinus haudquaquam Notorium esse. Illa enim Clauſula, in causis evidentibus, certis & planis, locum non habet: Sed tum demum Sententiis intexitur, cum Judex se per errorem labi & extra callem ire posse timet, & dubitat an reum absoluere vel condemnare debeat. Sicut quotidiano vsu & praxi obseruatur, & probat Gylm. Tom. 1. Symphor. p. 1. tit. 2. n. 139. fol. 105. Wehner. in Pract. Obser. in Verbo: Pro qualitate rei.

IN FICIAS quidem ire nemo potest, sed omnibus vulgo compertum est, Palatinum Electorem libertimis Procerum in Bohemia suffragiis electum, & ardentissimis postulationibus expugnatum, Diademam Bohemicum accepisse; & Se in oblatâ, absque vi & viribus apprehensâ, possessione tueri & defendere conatum fuisse. Factum autem ejus ita comparatum esse, ut illi Constitutioni adpositè per omnia quoad pœnam conueniat; nec fieri posse, ut quicquam defendendo objici possit; & per consequens, incusatum, ipso Jure statim, absque ullâ vltiori cognitione & examinatione, in Proscriptionis & alias ab Imperio petulantibus pacifragis irrogatas pœnas incidisse, haud tam facile erit probatu. Examinandum quoque erit & dispiciendum, An defensiones & exceptiones Palatini Principis, an ejus in publicum evulgatae, & solemniter inuocato in testem DIVINO NUMINE factæ protestationes, quibus Se à tam detestabili culpâ & à Dolo Malo vindicat, ab accusante & culpante parte verè renelantur & confutentur? **D**O LV S autem pro substantiali Requisito in Constitutione Pacis Publicæ ponitur. Verba enim dicuat, DOLOSE, MALITIOS E, OB STINATE, PROPOSITO ET EX INSIDIIS. Gail. De pace publ. cap. 7. n. 6. Et quamlibet cauſam, etiam leuem & injustam, ab eo excusare docent in terminis, Menochius Recuperand. remed. s. n. 52. Crauetta Consil. 6. n. 90. & Consil. 319. n. 14. Hondoned. Consil. 105. n. 27. & seqq. Farinac. De pœnis temper. quast. 90. n. 26. & passim.

DO LV M AVTEM ET FRAUDEM à Palatino Electore [nec commissam nec cogitatam, ex eo planè liquet. Primo, Quod in ipsa Proscriptione alleratur, ILLVM SVB INITIA STATIM SVSCITATORVM IN BOHEMIA MOTVVM, OMNISTVDIO GLISCENTES FLAMMAS SOPIRI, ET FLVCTVS DISCORDIARVM COMPONERE CONATVM. Deinde, Quod solemnî ritu modôq; vocato in testem DE OTOTI ORBI protestatus sit. Se numquam ambitione corruptum electionem prensasse & expetiisse; sed diuinâ quadam virginalâ contra spem, vota, & opinionem, concordique Prouincie calculo fuisse ad sceptrum vocatum. Denique, Quod electionem clâm non

habuerit, sed suis Coëlectoribus & aliis, missis legatis & litteris, pateficerit. Quod numquam fecisset, si dolo & fraude ad Diadema viam sibi sternere voluisse. Quocirca pacem publicam à Palatino eversam fractamque, præsupponi non potest: præsertim cùm in eodem, cui Imperator innititur fundamento tituloque Jus suum fundet: nec quicquam aliud tentarit & fecerit, quām quod concors omnium electio efflagitarat. Hoc ipso exemplum aliorum Principum, nominatum verò quorundam A V S T R I A C O R V M secutus, conscientiam suam exonerare, Regnum Bohemiæ à majori exitio, quod imminebat, affterere, & Imperio, à quo illud per exterorum ambitum auelli timeret, vindicare et conseruare studuit. Quare tantum abest ut D o l i insimulari et conuinci queat, vt etiam à pluribus ejus factum, tanquam egregium et gloriosum, quo oppressis et ad incitas redactis succurrere voluit, magno laudum pœnitio extollatur.

F I N G A M V s sanè Bohemiæ Ordines, abdicando & priuando Imperatorem seepstro, culpam aliquam & noxam in se admisisse: illam autem Electori Palatino, vix pot' qui ejus rei gratiâ numquam vel minimum procurauit, imputandam, & ab eo expiandam esse, quis integrī sanique cerebri judicari?

D A N T I Q V E nec per irruptionem & excursionem in Austria agros, ab exercitu factam Bohemico, D o l v s probatur. Omnibus enim vbiique gentium constat, exercitum illum non Electori Palatino, sed Ordinibus Bohemicis sacramento & stipendio obligatum fuisse; nec ab eo, sed à dictis Ordinibus, & quidem multo ante Electionem tempore, tum ad diuertendos hostes, tum ad res à Tampiro prædando ablatas recuperandas, in Austriam missum. Idcirco nec hoc Electori Palatino adscribi & imputari potest.

Q V O D V B R O ex Confœderatione cum Turca, æterno Christiani nominis hoste, missis solemniter legatis initâ vel ineundâ D o l v s arguitur; illud æquè impertinens ac superiora sunt. Primo, Quia nihil aliud legatione illâ ad Portam Ottomanicam, quām vt in his motibus Turca quiescere, & nihil hostilitatis contra Vngariam, Bohemiam, & Incorporatas Provincias, suscipere vellat, quæsitum. Deinde nec in Domus Austriacæ, nec alterius alicujus Status perniciem quicquam petitum: nec auxilia mutua sunt pacta. Tertiò Elecotor Palatinus non ipsus, sed Regni Ordines junctis confœderatis Provinciis, quibus ille refragari non debuit, Legationem illam decreuerunt

runt & miserunt: Tum quicquid etiam in illâ Legatione effectum, non ab Electore Palatino, vt Electore & Membro Imperii, sed à Rege Bohemiæ factum. Denique, Cur Electori Palatino vt Regi Bohemiæ, pro dolo & crimine perduellionis imputatur, quod in aliis, vt Veneſis, Belgis, & ipsis etiam A V S T R I A C I S, cum Turca pacisentibus & negotiantibus, non culpatur?

Q V O D S I interpretatio sæpius laudatæ Constitutionis, non hoc, vt supra demonstrauimus, modo facienda esset; quid obstat, quin Imperatori, qui æquè ac reliqui Imperii Proceres Constitutionum legibus ligatur, non idem facinus, Quodque Ipso Facto, vigore illius quod præsupponit, in pœnam fractæ pacis, absque illâ alia Declaratione incident, objici & ex iisdem argumentis extorbrari & imputari possit? In propatulo enim & confessio est; non tantum in Regno Bohemiæ, vim immanem exerceri; sed etiam Palatinatum, & Ducis L V D O V I C I P H I L I P P I Palatini, aliasque ditiones omnino innocuas, cauſæque Bohemicæ minimè implicatas, introducto externo contra patrum morem & leges milite, bello cruento infestari & deuastari. Dicéntne aliquis, Imperatorem hoc bene & excusare & defendere posse? Sed quâ Juris specie, quo Legum velo, defensiones reo, contra omnia diuina humanaque jura auferri, & ab executione & pœna processus inchoari possunt? Quodsi Imperator merita & justiam causæ opponere, & in medium proferre sataget; etiam ex alterâ parte rationes & argumenta & ea, quæ in Apologia Ordinum Bohemiæ deducta, nec vñquam, quod sciamus, refutata sunt, deponentur, & censuræ candidi judicij & sinceri subjicientur.

P O R R O N I H I L R E F F E R T, nec quidquam ad Persum, vt ajunt, facit, Quod cum tantâ animi commotione, calore & odio facinus exaggeretur; Quodque tandem in proprii conmodi studiū concludatur, Factum N O T O R I V M, & Publicum, ac ita comparatum esse, vt Constitutioni de pacis publica turbonibus adprimè conveniat, & idcirco præter meram Executionem nihil requiratur. Nam multa dicuntur Notoria, quæ tamen Notoria non sunt. In terminis Decius Consil. 544.n.13. Goedd. Consil. Marpurg. 24. n. 228. volum. 1.c. consuluit. 14. de appellat. Et nullum est malificium tam notorium, quod non possit habere aliquas excusationes, Qualitates & circumstantias occultas, excusantes delinquentem. Hoſticas,

stens. Caualcan. *De brachio regio par.* 1. n. 207. Farinac. *De delicto & paenit. q. 21. n. 50.* in tractat. de Notorio n. 70. Post Neuiz. & Curt. Colerus *De Process. execut. par.* 3. c. 1. n. 54. Quin etiam in delicto notorio commissio, coram Judice pro tribunali sedente brevis terminus ad faciendum defensiones suas, reo dari debet. Ut d. p. 2. n. 204. docet Cavalcan. & Farinacius. d. q. 21. n. 158. & ibi allegat. Et sane IN HOC I F S O P V N C T O, vbi factum Notorium esse ab vnâ parte perhibetur, ab alterâ negatur, candidi iudicij DECRETO & decisione O P V S E S T R. Gail, in terminis. *De pace publica.* lib. 1. capl. 3. n. 4. Seq. per multos. Decius Consil. 484. n. 28. Vbi concludit & probat, In tali declaratione Notoriis, partem debere citari; alias sententiam nullam esse. Innocent. In c. tit. nos. n. 8. 9. de cohabit. cleric. & mulier. Baldus In c. ad nostram. n. 4. de jurejurand. Vbi causæ cognitione in Notoriis opus esse dicit. Gail. pluribus d. o. 3. n. 12. Q V I D V E R O absurdius es- set & iniquius, quam Imperatorem in propriâ causâ, quâ Sibi tantum interesset, & ex quâ omnem suam incolumitatem dependere affirmat, non tanum Judicem, sed & T S S T B M, cum maximo tertii præjudicio esse velle? Vtrumq; omnis ratio, naturalis æquitas, gentium iuris, & leges ciuiles abominantur & execrantur. L. Nullus ff. *de testib.* Farinacius *De testib.* lib. 2. tit. 6. q. 60. n. 1. & seq. vbi ait, Hanc opinionem non habere contradictem: Et in hac materiâ C A V S S A M P R O P R I A M dici etiam illam, in qua quis commodum aut interesse aliquo modo habet. Et ampliat hanc regulam n. 15. vt nec Rex vel Princeps possit esse Testis in propria causa, in qua habet interesse vel commodum. Et hoc ipsum confirmat in terminis Decius d. consil. 544. Vbi n. 6. 7. 12. 13. 14. post Cardinal. & Ifern. latè probat, Quod IMPERATORI BANNIENTI NON C R E D A T V R, D V M in narratis banni afferit, Quod talis fuit proditor sius, & contra eum commiserit crimen læse Majestatis: Et quod valde absurdum esset, stare verbis vel litteris Imperatoris, in præjudicium alterius, præsertim procedentis absque citatione & causæ cognitione: quia hac ratione posset aliquem priuare jure suo ex sola assertione. Idem tradit in terminis Afflict. *Decis.* 14. n. 6. & ibi Vrsill. n. 7. 8. Petra *De potest. Prince.* cap. 32. q. 8. princip. n. 29. & conclus. 2. princip. n. 43. 45.

P R A E T E R E A prætensam illam facti notitiam falsam, & nullo planè modo attendendam esse, ex eo colligitur: quod haud exigua quâ Pontificiorum, quâ aliorum ORDINVM IMPERII PARS, tum ab initio statim, cùm Palatinus Elector sceptrum Bohemicum è manibus electionis Jus habentium accepit, tum post, NEVTRÆ SE F A C T O N I applicare voluerint: id sane factio tam manifesto & notorio, vix ausi; nec A D I L L V D faciendum ab IMPERATORE, Archiduce ALBERTO, & Marchione SPINOLA, ADMONITI fuissent; præsertim cùm nemini in tali patriâ Salutem concernenti casu, manibus compressis sedere liceat; sed quilibet, absque omni contatione & morâ, oppressis pro virium modulo opitulatum ire debeat. Deinde, Si crimen tam euidens & notorium fuit; cur non statim in primordio virtute Constitutionum, quæ nunc allegantur, processum? Cur Proscriptio- nis Sententia octo menses, vsque ad Conuentum quorundam Electorum Mülhusi celebratum, qui tamen instantissime requisiti & postulati ei subscrivere recusarunt, suspensa & extracta fuit. Denique Dux Bauariæ acceptam ab Imperatore commissionem diplomate publico & armata manu denuncians, inter Bohemiæ Ordines & Elec- torem Palarinum distinguit; illos, vt manifestè rebelles se persecutum, minatur; hinc à tam enormi facinore eximit, dicens; Q V O A D P E R S O N A M I L L I V S E L E C T O R I S, A L I I S I N T E R M I N I S R E M V E R S A R I. Ne dicam jam, commentum illud criminis notorii, per Deductiones & Apolo- gias Ordinum Bohemiæ irritum factum, in fumum & vaporem abire, sicut poma illa in Judæâ, quæ manibus contacta evanescunt.

S E D S E P O S I T I S his & similibus argumentis & rationibus, inspiciamus quælo; quid in hoc puncto C A P I T U L A T I O, ad cuius strictam & perpetuam obseruationem Imperator se Sacrosancto Juramento ex veterum instituto in auguratione suâ obstringit, decernat & statuat? Claris enim, disertis & minimè ambi- guis verbis religioso Sacramento Imperii Electoribus pollicitus est, S E O B V I A R E ET I M P E D I R E, N E C V I L L O M O- D O C O N C E D E R E V E L L E, V T A L I Q V I S EX O R D I N V M S T A T V V M Q V E N Y M E R O,

SIVE ELECTOR, SIVE PRINCEPS, AVT
ALIVS, SINE CAVSSA, IN AUDITVS
PROSCRIBATVR, DAMNETVR, ET DE-
CLARETVR: SED ALLABORATVR VVM,
VT IN HOC, SECUNDVM ORDINARIAM
IVRIS NORMAM, ET IMPERII CON-
STITUTIONES, EX PRÆSCRIPTO RE-
FORMATÆ ORDINATIONIS CAMERÆ,
PROCEDATVR: Additâ hac Clausulâ: SI QVID
CONTRA HOC, VEL ALIA CAPITULATIONIS
CAPITA, SVSCEPTVM ET ACTVM FVE-
RIT, ILLUD OMNINO NULLVM, IRRI-
TVM, ET VANVM ESSE DEBEAT. Quo-
circa opus non est, in explicatione Veterum Constitutionum moras ne-
cere, & per eandem lineam disputationis ferram reciprocare. Næ
ille igitur in frigidum furnum panem, vt ajunt, immittit, nugasque a-
git, qui Proscriptionem super antiquiores Imperii Constitutiones fun-
dare conatur, posthabitî & remotis recentioribus, indubbiis & juramen-
to confirmatis legibus. Cùm indubium sit, leges posteriores dero-
gare prioribus; præsertim quando per illas posteriores Constitutiones
reuertetur ad Jus Primævum & Commune; vt nostro casu, quo
contra Jus Diuinum, Naturale & Ciuale est, Quod aliquis indicia cauf-
sâ & non citatus condemnetur. Tunc enim latissimè fieri debet
interpretatio. Gail. 2. Obseruat. 84. n. 7. Virsill. ad Afflict. Dicte
62. n. 2. Sixtin. Confil. Marpurg. 9. n. 47. 48.

PORRO CVM Imperii Constitutiones, sicut ex earum te-
nore patet, REGEM BOHEMIÆ, vt pote cum quo nequa-
quam, sed cum Sex Electoribus, & reliquis Germaniæ Imperiisq; Mem-
bris, erectæ sunt et conclusæ, nec tangent, nec ligent; quid iniquius,
quā Imperii Statum, ratione alicuius noxæ REGI BOHEMIÆ,
vt REGI, imputatæ, tamquam pacis publicæ violatorem punire,
damnare & proscribere? Compertum enim est & in vulgo no-
tum, Regem Bohemiæ ex sententiâ Austriacorum, Imperatoris & Oma-
ni Majestatem, ratione dumtaxat Electoriæ dignitatis & Officii Magni
Pincernæ

Pincernæ recognoscere: ceterâ à Jurisdictione Imperioriâ non minùs
ac Sabaudum, Milanensem, & alios extra Germaniam Imperii Vasallos,
qui prædictis Constitutionibus non ligantur, exemptum & immunem
esse. Quare ad Imperii Comitia, cùm de Contributionibus, de Sub-
sidiis in Turcas, de re Monetariâ, & aliis agitur, non vocatur; sed pe-
reginus & alienigena censetur; adeò vt nec Circulo alicui addictus, nec
Collectis aliisq; Imperii oneribus obnoxius sit. Hart. Maurus De Coro-
nat: Carol. V. Joachimus Cluten In Sylloge rerum quotidiana. Thes. 24.
ad lit. e. Sicuti inter alia ex Declaratione Imperatoris FERDI-
NANDI I. Ordinibus Imperii factâ & exhibitâ, in quâ R E-
GNUM BOHEMIÆ AB IMPERIO EX S M T V M
T S S E, nec illi quoquis modo subjici affirmat & contestatur, lucu-
lentè perspicitur.

Quid multis opus est? In recenti adhuc
vividique omnium memoriam est, quid RODOLPHO IMPRE-
BATORI euenerit. Quis se mouit? quis ejus gratiâ equum
inscendit? quis indignatus fuit? cùm ei Vtrumque Sceptrum à Fratre
per vim & arma eriperetur. Quis tunc acceptorum meritorum me-
mor fuit? Quis longæuo & in triginta octo annos extracto felici e-
jus regimine mouebatur? Quis pacem publicam fractam tubatam-
que dixit?

QVID ERGO de hoc Proscriptionis monstro judican-
dum sit, nemo non videt. Illam enim ipso Jure, & ex sententiâ Ca-
pitulationis, in se ipsam esse vitiosam, inualidam & nullarum virium;
vel ob eam præsertim causam, quod sœpius laudata Capitulatio tam
religioso & factosancto Jurejurando sit confirmata & stabilita. Ju-
ris autem est, actum contra Juramentum de non faciendo factum,
etiamsi cum Juramento fieret, esse ipso jure nullum. Consult. Sak.
Tom. 3. p. 1. q. 16. n. 1. & ibi citati. Cùm præsertim persona ju-
rans esset CÆSAR vel Princeps, Apud quem, teste Alfonso
Rege Neapolitano, vel SOLA FIDES tantum valere de-
bet, quantum Juramentum apud Prinatos. Et Aristoteles monens a-
uquando Alexandrum Magnum, O Alexander, inquit, Obserua fidem
datam, & fædera confirmata; alias malus finis sequetur.

QUOD VERO commissi errores, per insertam illam Proscri-
ptioni clausulam, PRO RATIONE ET MOODO
PRÆSENTIS CAVSSÆ, excusari & tegi velint: Quasi

nempe Imperator ex singularibus rationibus motus, à Capitulatione suâ juratâ recedere, eamque in præsenti casu limitare voluerit: Quid aliud est, quām colori fucum inducere? Siquidem, vt dictum est, tales circumstantias & rationes subesse, & Imperatori in suâ causâ earum cognitionem competere, ex hac parte negatur: Præsertim cùm CAPITVLATIO dicta dilucidis verbis præscribat, & dicat: IMPERATOREM CONTRA AVREAM BULLAM, ET ALIAS IMPERII CONSTI-TUTIONES ET PACTIONES, NVLLVM MANDATVM, RESCRIPVTVM, AVT QVID-PIAM QVOD GRAVAMEN INFERRE POSSIT, E DERE, NEC VTI, NEC VTA-LIVS OBTINEAT AVT VTAT VR PERMITTERE DEBERE, VEL POSSE. Cùm autem minimè ambiguum sit, Capitulationem vim habere Contractus, à quo Imperator se ipsum relaxare nequit; cùm pactis & contractibus æquè obligetur ac quilibet priuatus. L. Cæsar. i. 5. de publican. L. de contractu, 3. c. de rescind. vend. c. 1. de natura feudi. Goeden. Consil. 3. 2. n. 5. & pals. D D: meritò infertur & necessario concluditur, Imperatori integrum non esse, nec eum posse contra leges Imperii à se juratas venire vel dispensare. Dauth. Ad l. 3. n. 5. C. de testam. Bellug. In specul. Princip. Rubr. 7. n. 4. & seq. & ibi Borell. In Addit. Verbo Constitutionem juratam allegat ad hoc Gloss. singularem in c. cum non deceat. In fin. de Electi in b. Buxtorff. Ad Aut. Bul. Conclus. 7. & in Notis ad lit. f. Maximè verò, cùm dispensatio absque cognitione caussæ fieret: Tum enim prorsus non valeat. Petra De potest. Princip. c. 3. 2. n. 5. 3. 6. 2.

N E C Q V I C Q V A M Clausulæ illæ, Ex PL ENITV-DINE P OTESTATIS, et Ex CERTA SCIE-N-TIA, hoc loci patrocinantur, Noti enim Juris est, dictas Clau-sulas nihil operari in præjudicium tertii; nec in contractibus Princi-pis; nec in caussis magni præjudicij; nec contra jus Naturale & Gentili-um, quod omnibus defensionem permittit; nec, quando Imperator pro-coderet absque caussæ cognitione, locum habere, Prout commu-niter traditur à D D. Petra De potest. Princep. cap. 26. n. 30. 3. 3. & cap. 32.

cap. 32. princip. dubit. 2. n. 57. 88. 93. 112. & passim. & Conclus. 2. n. 7. 19. 54. 57. & per tot. & Conclus. 3. n. 8. 10. 11. 18. Zaf. Lib. 11. Consil. 10. n. 24. 25. Bodinus De Republ. lib. 1. n. 98. 99. 100. Meisch. 1. decif. 12. n. 19. Pruckm. latè §. Soluta potestas. cap. 2. o. 3. & cap. 4. memb. 1. effct. 5. per totum. Covarr. Lib. 3. variar. Resolut. cap. 6. n. 8. 9. Vbi latè probant, quid de hac Clausula PL ENITV-DINIS P OTESTATIS sentiendum sit.

 VÆ CVM ITA SINT; ET ALIAS ad robur viresque cuiuslibet actus hæc tria, VOLVN-TAS, POTENTIA, & JVSTICIA, con-junctim requirantur: Goedd. Consil. Marpurg. 24. n.

148: Ab hac verò Proscriptione postrema illa duo pal-maria absint: Quid de illius effectu & valore censendum sit, infans jūdicarit. Quod Nullum est nullum effectum producere potest. C. non præstat. De regul. Jur. in b. Vrsill. ad Afflict. Decis. 85. in pr. & decis. 21. n. 19. Vnde docet Vantius de Nullit. tit. quoties & intra quod tempus. n. 44: Quod stante Statuto, Quod bannitus impunè offendi possit; occidens eum qui nullitet bannitus, non excu-setur, quò minus puniatur ordinariè, si habuisset notitiam nullitatis; alias cùm diligenter perquirere & se informare potuisset, tamquam culpabilis, judicantis arbitrio plectendus sit.

Q V A M O B R E M censuræ & judicio totius Mundi subjici-mus; Num Electoris facinus tamè enorme, tamè manifestum, tamè eu-idens & ita comparatum judicari posuit, vt statim inauditus, non citat-us, & indefensus, ab incompetente Judge, in suâ causâ absque co-gnitione jus dicente, ex vindictæ & proprii emolumenti studio da-mmante, proscribi, in pœnam omnium acerbissimam declarari, læsæ Majestatis damnari, & pacis publicæ fractor & Imperii perduellis de-nunciari potuerit?

E D V T V E L A contrahamus; quid, obsecro, tristius & ma-gis stupendum præsenti & futuro sæculo? quid Imperio Romano & toti Orbì Christiano perniciosius est? quām videre Electorem pri-marium; ex antiquissimâ & illustrissimâ Principum Germanorum pro-

Spiā oriundum, omnibus in Europā Regibus & Principibus sanguine,
affinitate & fœdere junctum, Imperii defuncto Imperatore Provisor
rem, Cæsar ex antiquâ consuetudine & lege Judicem, opibus, poten
tiâ, prudentiâ, præclaris in orbem Christianum meritis, autoritate, di
gnitate inclytum & conspicuum; ab Imperatore, in propriâ causâ Ju
dice & Teste, non citatum, inauditum, indefensum, & absentem, ca
pitis damnari, contra Imperii Leges & Capitulationem Imperatoriata
proscribi, pace & fide Imperii excludi, reum læsa Majestatis & perdu
ellionis declarari, bonis & honoribus per sententiam priuari? Ejus so
bolem innocentem & tenellam omni spe bonorum & honorum exui,
ejusque vitam, in quâ tot millia innocentium inclusa, omnibus impu
nè offendendam permitti? Denique amicos, socios, & subditos, si
ei adhærent, pœnâ mortis & proscriptionis reos fieri? Quid aliud
hoc est, quam liberis cœuicibus J V G V M H I S P A N I C V M
imponere? sublatâ antiquâ & sanguine partâ libertate seruitutem Im
perio incognitam & morte turpiorem inuichere? Imperatori infinita
m, rectâ rationi & juramento firmata Capitulationi contrariam, &
priscis exosam potestatem attribuere? Jus absolutum vitae necisque in
omnes Electores, Principes et Proceres, pro lubitu exercendum stabili
re? Q V A R E I G I T V R omnes bonos et veros Ger
manos, patriæ et libertatis amantes, per priscam Majorum fidem, per
antiquos Penates, per auream libertatem obtestamur, adjuramus, et
hortamur, ut accurato et diligenter oculo hunc pernicioſissimum, et
instar morbi fluentis latè graſſaturum, moxque alios correpturum Pro
scriptionis processum intueantur, abominentur; ei omni conatu
remediis conuentibus obuient; Et cogitent, Q V O D
C V I V I S C O N T I N G E R E P O S.
S I T, Q V O D C V I Q V A M
C O N T I N G I T.

